

玄品錄卷之五

當五

玄品錄卷之五

當五

句曲外史吳郡海昌張天雨集

唐

道華

李白字太白山東人少有逸才志氣宏放飄

然有超世之心父為任城尉因家焉白有知  
鑒客并州識汾陽王郭子儀於行伍間稱為  
人傑而志尚道術謂神仙可致不讀非聖之  
書恥為鄭衛之作故其言多似天仙之辭李  
陽冰所謂三代以來風騷之後驅馳屈宋鞭

捷揚馬千載獨步唯公一人少與魯中儒孔  
巢父韓準裴政張叔明陶沔等隱於徂徠山  
酣歌縱飲時號六逸天寶中客遊會稽與道  
士吳筠隱於剡中既而玄宗召筠赴京師筠  
薦之於上遣使召白入見與語以七寶床賜

當五

食與筠俱待詔翰林白既嗜酒玄宗欲製新  
樂府亟召白已醉臥酒肆召入以水灑面即  
令秉筆頃成清平調詞三章帝嘉之嘗醉殿  
上引足令高力士脫鞵由是被讒放去乃浪  
跡江湖終日沉飲時侍御史崔宗之謫金陵

與白詩酒倡和嘗月夜乘舟自采石達金陵  
白衣宮錦袍於舟中顧瞻嘯傲傍若無人初  
賀知章見白賞之曰此天上謫仙人也天台  
司馬子微亦謂白有仙風道骨可與神遊八  
極之表後因從祖陳留採訪大使彥允請北  
海高天師授道籙于齊州紫極宮製青綺冠  
帔一副將東歸蓬萊仍羽人駕丹丘耳世以  
爲太白之精一號上清鑒逸真人

### 道術

孟詵汝州梁人也舉進士垂拱初累遷鳳閣

舍人詵好方術睿宗在藩召充侍讀長安中  
為同州刺史加銀青光祿大夫神龍初歸伊  
陽之山第以藥餌為事詵年雖晚莫志力加  
壯嘗謂所親曰若能保身養性者常須善言  
莫辭口良藥莫離手睿宗即位召赴京師將

當五

二

加大用固辭衰老景雲中優詔賜物百段勅  
令每春秋二時給羊酒糜粥開元初河南尹  
畢構以詵有古人之風改其所居為子平里  
卒年九十三撰家祭禮各一卷并補養方三

卷

張果不知何許人也嘗著陰符經玄解盡其  
玄理後授銀青光祿大夫號通玄先生

道默

朱桃椎益州成都人澹泊絕俗被裘人莫能  
測其所爲長史竇軌見之遺以衣服鹿幘麕

鞞逼署鄉正委之地不肯服更結廬山中緝  
木葉自蔽贈遺一無所受嘗織芒屨置道上  
見者曰此朱居士屨也爲鬻求茗易之置其  
處輒取去終不與人接其爲屨草柔細環促  
結密人爭躡之高士廉爲長史脩禮迎致之

降階與之語不答瞪視而出士廉再拜曰祭  
酒其使臣以無事治蜀耶乃簡條目薄賦歛  
州大治屢遣人存問見輒走林草自匿云

### 道術

王希夷徐州滕縣人也孤貧好道父母終為

當五

三

人牧羊收傭以供葬葬畢隱於嵩山師道士  
黃頤向四十年盡傳其閉氣導養之術頤卒  
更居兗州徂徠山中與道士劉玄博為棲遁  
之友好易及老子嘗餌松柏葉及雜花散景  
龍中七十餘歲氣力益壯刺史盧齊卿就謁

致禮因訪以治人之術希夷曰孔子稱已所不欲勿施於人可以終身行之矣及玄宗東巡勅州縣以禮徵至駕前年已九十六上令中書令張說訪以道義宦官扶入宮中與語甚悅開元十四年下制曰徐州處士王希夷絕學棄智抱一居貞久謝囂塵獨往林壑朕爲封巒展禮側席旌賢賁然來思克應嘉召雖迂綺季之跡已過伏生之年宜命秩以尊儒俾全高於尚齒可朝散大夫守國子博士聽致仕還山州縣春秋致束帛酒肉仍賜衣



一副綃百疋

道默

武攸緒則天后兄惟良子也恬澹寡欲好易  
莊周書少變姓名賣卜長安市得錢輒委去  
后革命封安平郡王固辭願隱居后疑其詐  
許之以觀所為攸緒廬巖下如素遁者后遣  
其兄攸宜敦喻卒不起后乃異之盤桓龍門  
少室間冬蔽茅椒夏居石室所賜金銀錫高  
野服王公所遺鹿裘素幃瘦栝諸物塵皆流  
積不御也暮年肌肉消眚瞳有紫光晝能見

星開元十一年無疾卒攸緒當諸武赫焰未  
嘗輒出卒不蹈其禍云

道隱

秦系字公緒越州會稽人天寶避亂剡中後  
客泉州南安有九日山大松百餘章相傳東

當五

四

晉時所植系結廬其下穴石為研注老子彌  
年不出刺史薛播數往見之歲時致羊酒而  
系未嘗至城門其後東度秣陵隱於茅山年  
八十餘卒南安人思之為立亭號其山為高  
士峯云

道品

張蘊字藏真晉陽人所居洪州山中因號洪崖子身長七尺五寸鬚眉秀異工琴書善長嘯開元中明皇召見于湛露殿授太常卿累加至司徒辭曰陛下何惜一丘一壑不令臣追跡巢由還山服氣絕粒好畜古物嘗乘雲精騾侍者五人橘栗葛朮常所服者垂雲笠六角扇方木鐙葛木如意魏惠壺諸物朱衣席帽出入人間聖之具神人焉所著書有老子周易三禮穀梁註河東記三十卷大周

昌言十卷豫章記曰隋開皇間改豫章為洪  
州先生蓋上古有道之士復見於隋唐間云  
按真誥洪崖先生今為青城真人墓在武威  
姑臧縣

五代

道言

當五

五

張薦明少以儒學遊河朔後去為道士通老  
子莊周之說晉高祖召見問道家可以治國  
乎對曰道者妙萬物以為言得其極者尸居  
衽席之間可以治天地也祖大其言延入內

殿講道德經拜以爲師薦明聞宮中奏時鼓  
曰陛下聞鼓乎其聲一而已五音十二律鼓  
無一焉然和之者鼓也夫一萬事之本也能  
守一者可以治天下祖益善之賜號通玄先  
生

### 道華

鄭遨字雲叟滑州人敏於文辭唐昭宗時舉  
進士不中見天下已亂拂衣遠去乃入少室  
山爲道士聞華山五粒松脂淪入地千歲化  
爲藥能去三尸因徙居華陰求之與道士李

道殷羅隱之友善邀種田隱之賣藥以自給  
道殷有釣魚術釣而不餌又能化石為金邀  
嘗驗其信然而不之求也世自為三高士節  
度使劉凝以寶貨遺之一無所受唐明宗召  
以左拾遺晉高祖召以諫議大夫皆不應賜  
號逍遙先生天福四年卒年七十四邀好飲  
酒奕碁為詩章寫縑素人間傳為寶玩或圖  
其形于屋壁瞻禮之跡雖遠而名愈彰與夫  
石門荷蓀之徒異矣

閻丘方遠字大方舒州宿松人幼慧辯學易  
於廬山陳玄悟問大旨於香林左玄澤澤竒  
之後居仙都山隱真巖從劉處靖修出世之  
術而子史群書不忘披覽嘗自言葛稚川陶  
貞白吾之師友也詮太平經為三十篇備盡

當五

六

樞要唐景福二年錢鏐謁于餘杭大滌洞築  
室以安之表上其行業昭宗累徵之方遠以  
天文推尋秦地將欲荆棘唐祚當革作之園  
綺無出山林竟不起乃降詔褒異就頒命服  
賜號妙有大師玄同先生由是真靈事跡顯

聞吳楚門下弟子二百餘人廣平程紫霄應  
召於秦宮新安聶師道行教於吳國安定胡  
謙光魯國孔宗魯皆得其奧者天復二年二  
月十四日沐浴端坐而化葬于大滌之白鹿  
洞錢武肅王夢騎鶴訪別

### 道質

聶師道字宗微新安歙人也性穎悟真淳言  
行謙謹養親以孝聞師間丘大方即郡之東  
山建問政山房嘗覽內傳見服松脂法入百  
丈山採松脂遇蔡真人父子及彭真人一入



山遽逢三仙人一日夜人間月餘矣其寔精  
習之命也師道深自嘆異每林中拾薪斲藥  
虎豹弭尾從之或以薪藥負其背上送歸而  
去歛之近山獸不傷人皆師道有以感之也  
母問師道遊學所益具陳其事喜而曰汝以  
孝養我以道資我何幸為汝母矣此蓋宿慶  
所及出遊南嶽九嶷擬尋梅真人蕭侍郎於  
玉笥梅即南昌尉福蕭即子雲字景喬梁之  
公子自東陽太守避侯景亂全家入山二君  
俱得道此山一日遊郁木坑乃遇謝通脩自

言本居南嶽與彭蔡同隱携至所居授以素  
書一通復還問政三十餘年每焚修即以彭  
蔡謝真形瞻禮吳太帝霸江淮聞其名徵至  
廣陵建玄元宮為所居賜號逍遙大師問政  
先生居廣陵又三十年弟子五百餘人後乃  
隱化而往絕世思望而問政山屢有雲鶴見  
歎之鄉里親族以為師道之還故鄉若令威  
之歸華表也有詔褒贈曰詢諸贈典繫乃彝  
章啓有厥由子何不舉故淮浙宣歙管内道  
門威儀逍遙大師問政先生為國焚修大德

賜紫聶師道早通玄理夙契真風野鶴不群  
孤雲自在昔太祖創基之際已命焚修及元  
勲匡國之初早曾瞻敬眷言素業實冠玄關  
雖昇遐屢歷於光陰而遺懿益隆於寰宇況  
教門上請台輔奏陳且將啓玄墟即回故里  
是用加之峻秩錫以崇階式表休恩庶昭往  
行可贈銀青光祿大夫鴻臚卿問政先生  
宋

道品

陳搏字圖南譙郡人小時戲渦水上有青衣

嫗抱乳之日令汝永無嗜欲聰明過人唐長  
興中舉進士不第去隱武當山辟穀鍊氣作  
詩八十一章號指玄篇後唐明宗封為清虛  
處士俄徙華山雲臺觀常閉門臥累月不起  
周世宗召至禁中驗之信然顯德末乘白驪  
當五  
將入東都聞宋太祖即位大笑曰天下定矣  
太宗時召之圖南疏辭曰臣性同猿鳥心若  
死灰不曉仁義之淺深安識禮儀之去就敗  
苻詐服脫箠為冠體有青毛足無草履苟臨  
軒陛貽笑聖明太宗再遣中謁者必起之且

賜詩曰

曾向前朝出白雲  
後來消息杳無聞

如今若肯隨徵召  
盡把三峯乞與君

圖南不得已詣闕冠華陽巾躡草履羽服垂  
紳以賓禮見賜號希夷先生遣詣中書堂使

謂宰相宋琪等曰搏獨善其身不干勢利入

華山已四十年計近百歲以天下治安故來

朝覲亦可念也琪等遂問修養之道答曰聖

上有天日之表正君臣合德圖治之時勤行

修鍊何以加此士大夫日往乞善言皆答曰

優遊之所勿久戀得志之處勿再往識者躋  
之圖南淹通群經而尤精易學蓋以授弟子  
穆修修傳李之才之才傳康節先生邵雍又  
以太極圖授种放放傳穆脩穆脩傳濂溪先  
生周茂叔圖南以故數發機先語後所以然

者世傳其有人倫風鑒始太祖居潛曰與趙  
忠獻公遊長安市圖南遇諸途曰可飲乎太  
祖曰願與趙學究俱圖南睥睨之曰亦可也  
既至酒家忠獻苦足痺亟就右坐圖南諾曰  
紫微垣一小星敢上次乎引而下之其召也

太宗令見壽王圖南及門而還曰王門廝役  
皆將相具何必見王由是太宗屬意真宗矣  
端拱二年豫知其終以表來上曰大數有終  
聖時難戀命弟子賈德昇於張超谷鑿石室  
室成而逝彌月五色雲蔽山谷不散

道儒

王昭素酸棗人也早學道尤邃於易嘗曰坤  
為十月卦十月純陰用事猶有陽氣在內故  
薺麥先生直至坤卦之末尚有龍戰之象龍  
亦陽也則知陽無剝盡之理蓋陰陽者剛柔

迭用變化日新生生所資而無盡者也其於  
道深矣鄉人尊其行有訟不之官府而獨詣  
決焉開寶二年召至講易踰月求歸特授國  
子博士以禮餞之時已耄矣至九十餘乃卒  
其首縮入腹中世言其能龜息云

### 道言

澄隱字棲真常山人通內外學太祖征太原  
還幸其居棲真時年八十容色甚少太祖問  
其養生者對曰臣養生則精思鍊氣耳帝王  
則異於是老子曰我無爲而民自化我清靜



而民自正無為無欲凝神太和黃帝陶唐享  
國永年得此道也帝大悅其亦孫思邈之流  
乎

道言

張無夢字靈隱鳳翔整屋人也與种放劉海

當五

十

蟾為方外交遊天台赤城廬於瓊臺嘗曰一  
者道之用也其要則無方無體無用無為無  
為無不為矣飛蠕蠢類皆舍道性得其道者  
無所不變小則糞蟲變蛭大則人可變仙矣  
於是觀天地變化草木盛衰風雲捲舒日月

還轉水火相激陰陽相摩之理著還元百篇  
真宗召見問以長生久視之旨對曰臣居山  
中但誦易經老子書而已不知其他因命講  
易即說謙卦上曰獨說謙何也對曰方當大  
有之時宜守之以謙上深然之復命講還元  
篇曰國猶心耳心無為則氣和氣和則萬寶  
結矣心有為則氣亂氣亂則英華散矣此還  
源之大綱也真宗嗟異之賜秩著作郎辭不  
受力丐還山後卒於金陵年九十九碧虛子

陳景元其弟子也

道言

劉烈九江人幼好道遇異人建隆中得道者  
因結廬廬山密修其道自號虛谷子往有譚  
景昇者作化書烈提其要曰太虛茫茫而有  
涯太上浩浩而有家得灑氣之門所以收其

當五

十二

根知元神之囊所以韜其光若蚌內守而石  
內藏藏之為元精用之為萬靈舍之為太一  
放之為太清大率以柱下漆園黃庭為宗嘗  
謂學道者萬物不能遷其性一心湛然而無  
思時導其氣則百骸皆適抱純白養太玄然

後不入其機則知神之所守氣之所生精之  
所復何行而不至哉

道言

張乾曜漢天師二十四代孫也天聖八年召  
至闕下仁宗問以白日冲舉事對曰此非所

以輔政教也陛下苟能返古之朴行以簡易  
志慮清明神氣完和矣奚事冲舉上嘉之賜  
號澄素先生

道質

傅霖青州人少與張忠定公誅同學忠定既

貴求之三十年不可得嘗慨思其人作詩以  
志其意晚年守宛丘有被褐跨驢叩戟門大  
呼曰語尚書青州傅霖來閹吏走白其言忠  
定怒曰傅先生天下名士汝何人敢斥名氏  
乎霖笑曰別子一世尚爾童心是豈知世間  
有我哉忠定問曰何昔隱今出耶曰子將去  
矣來報子耳忠定曰詠亦自知之曰知復何  
言遂別去不告所往踰月忠定卒

道默

率子廉衡山農夫也愚朴不遜衆謂之率牛

晚入南嶽觀為道士觀西南七里有紫虛閣  
故魏夫人壇也道士以其荒寂莫肯居者唯  
子廉樂居之端默而已人莫見其所為然頗  
嗜酒往往醉臥山林間雖大風雨不知虎狼  
過其前不害也故禮部侍郎王公祐出守長

當五

十二

沙奉詔禱南嶽謁魏夫人壇子廉方醉臥不  
能起直視公曰村道士愛酒不能常得得輒  
徑醉官人怒之王公察其異載與歸月餘落  
莫無所言復送還山曰尊師韜光內映老夫  
所不測也當以詩奉贈既而忘之一日晝寢

夢子廉來索詩乃作二絕句書版置閣上衆  
道士驚曰率牛何以得此太平興國五年六  
月二十七日忽謂觀中人曰吾將有所適閣  
不可無人當速遣繼我者衆益驚曰天暑如  
此率牛安往狼狽視之則死矣始大異之曰

率牛乃知死日耶即葬嶽下未幾南臺寺僧  
守澄自東都還遇子廉南薰門外神氣清舉  
守澄問何故出山笑曰閑遊耳寄書與山中  
人澄歸乃知其死驗其書則死日也發其塚

杖屨而已

道術

趙言代州人既得道行丐高安城中故為不  
潔清者元豐三年蘇轍子由謫高安忽過子  
由曰吾知君好道而未識其要陽不降陰不  
昇肉多而浮面赤而瘍教君挽水漑百骸浹

當五

十三

日諸疾除矣苟不怠度世可也子由用其言  
驗他日問及養性告曰亦嘗夢乎方其夢也  
亦有存歿憂樂之知乎曰是不可常也吉笑  
曰有夢覺之異則性不全矣子由矍然異焉  
知其誠有道者吉自言徃在廣陵為同學蔣



生毒其兩目遂翳然時能脫翳見童子碧子  
炯炯其臍以上骨如龜心以下如鐮兩骨相  
值其間不合如指時蓋百二十七歲矣後至  
興國軍太守楊繪元素留之居無幾俄為所  
畜驟蹠而死元素為葬之元祐元年蜀沙門  
法震來見大蘇公東都巨法震至雲安酒家  
見丐者云吾姓趙頃識蘇公黃州幸為我多  
問子由聞之驚問其狀知為吉也興國軍太  
守朱彥博子時在坐歸告其父發其藏唯一  
杖兩脛在耳道書稱尸解之下者留足一骨

豈謂是耶

道言

李昊劍州人善符禁陳述古知陳州官舍多  
鬼因空所舍堂致昊鬼即止蘇轍子由詰曰  
何能爾耶昊曰彼多欲故鬼侮之吾斷欲久  
非有他也間從問所以養生者答曰人稟天  
地五行以生與天地均五行之運於天地無  
窮而人壽不過百年者自戕之耳夫生而知  
物我之辯內而在我外而在物物我之情不  
忘於心我與物爲二則所受五行之氣判然

與五行大分不通因其所受厚薄各盡所有  
而止故或壽或夭今誠忘物我之異使是身  
與天地相通如一則五行之氣中外流注而  
不竭安有不長生者哉

### 道華

當五

十四

朱自英字隱芝句曲朱陽里人生於太平興  
國元年八九歲從牧兒郭干村能吹笛致鶴  
父母以為不祥棄之乃從茅山朱元吉著道  
士服時年十二端拱之初也繼與明真張鍊  
師居績金山頂試辟穀術人稍趨之遂思遠

遊至襄陽遇異人陳鐵脚挾往青城山復過  
瀨鄉校讎太清宮古藏經遇水星童子武仙  
童名抱一挾往河中府謂此行已抵太陰鍊  
形一度行止神變景德元年嗣茅山經錄二  
十三代真宗遣使祈胤山中明年生仁宗事  
具宋史奉旨住持玉清昭應宮勅建乾元天  
聖兩觀賜號國師明肅太后傳大洞畢法加  
號觀妙先生還山因得抱一蜀中所寄書意  
警責姓名顯耀暴露天機先生對之泣數行  
下弟子莫測也天聖七年十一月坐蛻于乾

元手執祥符所賜玉如意汗流浹體額有凝珠尸解之上者

道品

劉混康字混康晉陵人嘉祐五年試經為道士一夕夢神人告曰汝欲學道當擇名山嘗

當五

十五

患世無良師每散髮登壇以天為宗已而聞茅山毛宗師有道一見授以經籙庵居積金峯一日三羽士造其廬指庵之東隅曰汝即此以居抱神守中德惠及人當無愧古人也又顧其額間曰此無作之地道之所尚不可

以有疵手為捫之明日癩滅元祐元年哲宗  
聞其名以高道召勅住上清儲祥宮紹聖四  
年勅江寧府即所居潛神庵為元符觀別勅  
三茅山宗壇與信州龍虎山臨江軍閭皂山  
為經籙三山云徽宗益大其觀加號元符萬  
寧宮賜九老仙都君玉印玉樞具景震劔御  
書畫寶賜不一先生累表災變上雖加嘆而  
不能用其言大觀二年再召出山群鹿遮道  
一鹿觸車而斃命瘞之道左先是所蓄鶴聞  
召飛去先生曰鶴去鹿斃吾無還期四月至

京館于新作元符之別觀夜夢天帝召詰朝  
駕幸進上所誦大洞經十七日丁酉倏然解  
化年七十二勅建藏真觀於葬所累加至葆  
真觀妙冲和先生贈太中大夫謚靜一

道言

查淨之字清遠金陵人父携入茅山劉先生  
見而竒之曰此子他日人天師也師喜躍誓  
不復歸遂爲入室弟子元祐間從劉先生入  
朝先生被旨住儲祥宮以師歸主元符宮事  
政和三年七月三日召門弟子曰吾今年四

十六歲昔先師授記以爲過叨朝廷厚恩壽  
當不逾於此遂命脩遺表捉筆親題表後云  
陛下天縱聖哲尊道崇德自古帝王未有過  
者然念帝王奉道與臣庶不同一言一動上  
合天心則萬方蒙恩太上五千言以去奢去

當五

十六

泰慈儉爲先乃陛下之師寶致道之津梁也  
伏願陛下清心寡欲以保聖躬節財儉用以  
固邦本聽納忠良以廣言路天下幸甚如臣  
下愚固不當冒死陳詞實念先師付託之重  
嘗令臣以盡忠報國爲先當今之際不進一



言以裨聖德則臣違天負師抱恨泉壤矣操  
筆陳情伏增感愴臣淨之再言押書畢而逝  
表聞徽宗嗟悼不已以其表降付藏真觀刻  
石山中

道化

徐守信海陵人爲天慶觀傭役服弊布衣曳  
繩屨或跣行終日無所爲惟執帚掃除且誦  
度人經不絕口有道士徐元吉他方來病癩  
甚衆狀惡弗肯與處斥居觀後茅廬中守信  
獨事之謹元吉已而死丐錢爲斂葬旣已歸

茅廬哭三日日出而佯狂稍稍有異事人皆神之稱爲神翁始知得道於癩道士也自是四方多來問災祥哲宗不豫遣香至神翁所翁書吉人以進未幾徽宗嗣位崇寧初召之不肯起強輿至東都復不可留乃禮歸之即海

當五

十七

陵爲建仙源萬壽宮使居焉大觀二年召赴闕四月十七日聞茅山劉先生化于儲祥之別觀乃曰劉先生去我亦去矣即二十日庚子解去故降詔語有云誠意感通異人沓至了然委化不約而同贈太中大夫與劉先生

誥無異詞也

道品

張繼先漢天師三十代孫先生九歲得其法  
淵默寡言清癯白皙眉目真天人也徽宗遣  
使召之既至秩以碧虛大夫先生方十三歲  
辭不受崇寧四年再召命弭解州鹽池怪事  
甚神異賜號虛靖先生政和中大內災命醮  
禳之因奏紅羊赤馬之厄其語秘靖康初虜  
引去出塞朝廷再遣使與鄴太守詣先生廬  
致召必起之先生行至餘杭而色憂不怡人

莫之測已而乃聞虜復入寇急召入朝至泗  
州天慶觀端坐化去年三十六實丁未歲也  
後薩道人守堅復遇先生青城山高宗命設  
像於內中觀堂所著大道歌心說傳于世

道言

劉高尚濱州安定人家世爲農九歲不茹葷  
後稍稍不語問以事則書而對其語初若不  
可曉已而輒驗家人爲築別室以居久之言  
皆響應遠近以爲神徽宗三使往聘之辭疾  
不奉詔賜號高尚處士建觀以居其徒因以

其號名之靖康之亂虜人見高尚皆下馬羅  
拜不敢入其里高尚嘗有言曰世之人以嗜  
欲殺身以貨財殺子孫以政事殺人以學術  
殺天下後世識者以為名言周少隱既為之  
傳又推廣其言而為之說以為此古博大真  
當五  
人所以救溺起死還真之論豈世俗工言語  
文章者所能至哉先生農家子未嘗讀書事  
師而有是言豈神仙中之深知道者乎蓋又  
與夫熊經鳥伸吐故納新區區積歲月之功  
而欲著名於仙籍者固有間矣

道言

王道堅龍虎山道士政和間徵赴闕館于太  
一宮徽宗問以修鍊延年之術奏曰清靜無  
為軒黃所以致治多欲求仙漢武所以罔功  
夫修鍊非天子事也時方校定道藏經制授  
太素大夫凝神殿校籍同校定道經徽宗豫  
知國當有厄命道堅禳之奏曰修德可以回  
天檜禳之事不敢誤國力請還山紹興初高  
宗復遣使召先一日道堅鳴鼓集大衆舉頌  
有為報長安使休尋海上山比使至已化去

矣

道術

留用光信州貴溪人貌奇古而黔既壯無所  
聞往遊南嶽至撫州臨川縣路逢一道人自  
言是張輔元與用光偕行用光行為張負止

當五

十九

為張炊次長沙張謂曰子事吾勤亦至矣向  
吾慢子觀子之變子益加敬吾今入蜀有一  
篇授子子其祕之遂去啓視乃五雷書慶元  
間衢州旱郡守沈作礪夜夢黑龍蟠于城隍  
廟門旦視之乃用光醉臥也即延命禱雨而

兩郡上其事復禱雨于朝亦雨用光年幾四十未得度爲道士至是即御前賜冠服賜號冲靖先生寧宗爲出內帑錢撤上清宮新而大之理宗立復召用光謂使者曰歸奏天子治天下者道德五千言足矣山林野人來將奚益竟解化龍虎山中向之所遇張輔元或謂爲漢天師也

玄品錄卷之五

共灶



